

KERATAN AKHBAR

JUDUL : BERITA HARIAN

TARIKH : 17 Jun 2025

SITASI :

M/S :

Parzi, M. N. (2025, June 17). Perpustakaan perlu usaha tarik golongan muda minat membaca - pm. *BERITA HARIAN*. Retrieved June 17, 2025, from <https://www.bharian.com.my/berita/nasional/2025/06/1409030/perpustakaan-perlu-usaha-tarik-golongan-muda-minat-membaca-pm>

'Perpustakaan perlu usaha tarik golongan muda minat membaca' - PM



Oleh Mohd Nasaruddin Parzi - Jun 17, 2025 @ 12:38pm



Anwar diiringi Aaron, Saraswathy dan Shamsul Azri bergambar bersama tetamu pada majlis perasmian Persidangan dan Mesyuarat Kongres Pustakawan Asia Tenggara ke-19 di WTCKL hari ini. NSTP/HAIRUL ANUAR RAHIM

KUALA LUMPUR: Datuk Seri Anwar Ibrahim menegaskan perpustakaan perlu menjadi gedung ilmu yang berupaya menarik kehadiran masyarakat khususnya golongan muda termasuk pelajar untuk minat membaca.

Justeru, Perdana Menteri berkata, perpustakaan perlu bersedia dengan perubahan dan menyesuaikan persekitarannya dengan infrastruktur semasa seperti pembangunan digital dan kecerdasan buatan (AI).



Beliau berkata, perpustakaan dibina bukan tempat monumen untuk ditangihi, sebaliknya pusat percambahan ilmu yang amat penting dalam pembangunan sesebuah negara.

"Pustakawan mempunyai tugas besar, bukan saja tempat mereka menyebarkan pengalaman dan pengetahuan yang terdapat dalam buku, tetapi menjadikan perpustakaan pusat yang bertenaga," katanya berucap pada Mesyuarat Kongres Pustakawan Asia Tenggara ke-19 (CONSAL XIX) di Pusat Dagangan Dunia (WTC) Kuala Lumpur di sini, hari ini.

Turut hadir, Menteri Perpaduan Negara, Datuk Aaron Ago Dagang dan timbalannya, Saraswathy Kandasami serta Ketua Setiasuaha Negara, Tan Sri Shamsul Azri Abu Bakar.

Penganjuran CONSAL tahun ini menghimpunkan 1,200 peserta dari seluruh Asia Tenggara dengan pembentangan 89 kertas kerja yang bernas dan berwibawa oleh tokoh serta pakar pelbagai bidang.



Bertemakan Memanfaatkan Inklusiviti, Memperkasa Kemanusiaan, CONSOL XIX 2025 menekankan kepentingan keterangkuman dalam akses dan penyebaran pengetahuan kepada semua lapisan masyarakat.

Anwar berkata, memperkasa ekonomi negara mesti berasas kepada ilmu, yang mana selain universiti dan sekolah, perpustakaan adalah tempatnya.

"Peranan pustakawan bukan sekadar menghimpunkan gedung buku dan memperindahkan almari kaca, tetapi menjadikannya medan dan wahana penting bagi memupuk kesedaran minat membaca," katanya.

Mengulas lanjut, Anwar berkata, perpustakaan perlu mempelbagaikan ruang yang ada bukan sekadar tempat membaca, sebaliknya lokasi perbincangan kumpulan.

Sementara itu, Anwar turut menghargai inisiatif penubuhan Perpustakaan Digital ASEAN (ADL), yang menghimpunkan metadata daripada perpustakaan negara anggota dengan kini tersedia akses rentas sempadan kepada puluhan ribu bahan digital termasuk manuskrip langka, artifak budaya dan dokumen sejarah.

Terdahulu, Aaron berkata, perpustakaan masa kini bukan lagi tempat penyimpanan buku, tetapi sudah berevolusi menjadi lambang keadilan ilmu, pintu akses digital, penjaga khazanah budaya dan pusat pembelajaran sepanjang hayat.

"Malaysia mencatat kemajuan amat membanggakan dalam merevolusikan ekosistem perpustakaan negara, antaranya menerusi inisiatif u-Pustaka, iaitu platform perpustakaan digital nasional yang boleh diakses menerusi www.u-pustaka.gov.my.

"Platform ini menyediakan perkhidmatan pinjaman sumber fizikal dan digital seperti e-buku, buku audio, akhbar, jurnal serta penerbitan kerajaan secara percuma, pada bila-bila masa dan di mana saja," katanya.